

Inatsisartut Suleriaasianni § 32, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Kalaallit Nunaata aallartitaasa siulittaasuat, Josef Motzfeldt, imaattumik aalajangiiffigisassatut siunnersuuteqarpoq:

Nunat Avannarliit Killiit Siunnersuisoqatigiiffiata aalajangersagaata nr. 4/2008-p Inatsisartunit taperserneqarnissaanik Inatsisartut aalajangiiffigisassaattut siunnersuut, aalajangersagaq ima oqaasertaqarpoq:

2010 aallarnerfigalugu nunani avannarlerni killerni tamani ukiut tamaasa qaammatip aggustip naanerani tallimangornermi kingullermi Nunat Avannarliit Killiit ulluata Islandimi, Savalimmiumi Kalaallillu Nunaanni naalakkersuisunit ingerlanneqartarnissaata isumagineqartalernissaa Nunat Avannarliit Killiit Siunnersuisoqatigiiffiata innersuussutigaa. Nunat Avannarliit Killiit Siunnersuisoqatigiiffiat, nunani avannarlerni killerni pingaarnertut aallartitaqarfiit aamma aallartitaqarfiit atorfilittaqarfiusut, illoqarfiit pingaarnersaat, takornariaqarnermik siunnersuisoqatigiit aammalu nunani ataasiakkaani kulturikkut ingerlatsiviit kiisalu nunani avannarlerni illuutini pisortat suleqatigalugit nunami oqartussaasut ullormik pilersaarusionertik ingerlattassagaat Nunat Avannarliit Killiit Siunnersuisoqatigiiffiata kaammattuutigaa.

(Josef Motzfeldt, aallartitat siulittaasuat)

Tunngavilersuut

Aalajangersakkakut nunani tamani ukiut tamaasa Nunat Avannarliit Killiit Ulluat ingerlanneqartalissasoq Nunat Avannarliit Killiit Siunnersuisoqatigiiffiata siunnersuutigaa. Nunat avannarliit killiit ulluat Københavnimi sapaatip akunnerata naanerani 26. aamma 27. april 2008-imi Nunat avannarliit killiit illuanni, Nordatlantens Bryggemi, aappasaanik ingerlanneqartoq innersuussutigineqarpoq, tassani nunat avannarliit killiit tamarmik immikkut namminneq saqqummersitsiveqarput taakkunani nipilersorluni ilanngutassiisoqarluni pisiniarfimmilu nerisassanik nioqqutissanillu nunanit pingasuneersunit tuniniaasoqarluni.

Nunat Avannarliit Killiit Ulluata siunertarissavaa nunat avannarliit killiit oqaluttuarisaanerat kulturiallu malunnartissallugit taamaaliornikkut suleqatigiinneq aammalu nunat peqataasut akornanni ataqatigiinnermik misigissuseqarneq annertusiniassallugu.

Matumani siunnersuutigineqarpoq Nunat Avannarliit Killiit Ulluat 2010-mi aggustimi siullermeerutaasumik malunnartinniarneqassasoq Nunat Avannarliit Killiit Siunnersuisoqatigiiffiata Tasiilami ukiumoortumik ataatsimiinneranut siuttullu ataatsimiinnerannut atatillugu. Ukiumoortumik ataatsimiinneq malunnartinniarneqarpoq eqqumiitsuliat nunanit avannarlernit killeerneersut frimærkitullu saqqummersinneqartarsimasunut aallaaviusimasut saqqummersinneqarnerisigut. Saqqummersitsinermi pilersaarutigineqartukkut eqqumiitsuliat nunat avannarliit killiit ataatsimut oqaluttuassartaqarnerat kultureqarnerallu ersersinniarneqassaaq.

Siunnersuutigineqarpoq nunat avannarliit killiit ulluat paarlakaajaattumik nunani pineqartuni pingasuni ingerlanneqarsinnaasassasoq assersuutigalugu nunat avannarliit killiit festivaleqarnerisigut taamatullu aamma nerisassaatitta, nipilersortakkatta, timersuutitta malunnartinniarneqartarnerinut. Oqareernittut siunnersuutigineqarpoq nunat avannarliit killiit ulluata annertusisamik malunnartinniarneqartarnissaa nunani avannarlerni killerni pingasuusuni paarlakaajaattumik pisassasoq, taamaalilluni nunat pingasut tamarmik ukiut pingasut ingerlaneranni nunat avannarliit killiit ulluannik aqqissuussiviusarniassammata.